

Arubiano su obra di pintura ta forma parti di e loteria di arte na Hulanda



ORANJESTAD - Pa e prome sorteo di De Nationale Kunst Loterij (DNKL), Gustave Nouel, artista conoci di Aruba bibando na Hulanda, tabatin e privilegio di pinta e premio nacional di potret.

Ganado Sr. Gepko Bruin di Zaandam, recientemente a ricibi e pintura special aki for man di Ministro Plenipotenciario di Aruba na Den Haag, sr. Edwin Abath. Presente di parti di DNKL



tabata, Srs. Felix Timmermans y Jochem Schuijt, cu ademas ta propietario y editor di Palet, e revista di Arte mas grandi di Hulanda. DNKL (www.dnkl.nl) ta un loteria di Arte Hulandes nobo cu tin como meta pa yuda e mundo di arte nacional Hulandes.

E premionan ta - ademas di placa, tambe e ganado ta gana e obra di arte como premio cu e loteria ta cumpra di artistanan di henter Hulanda.

Directiva di DNKL a bin na un acuerdo cu 'Kansspelautoriteit' pa organisa e proximo sorteo na fin di 2013.

Intencion ta pa e biaha aki, banda di e premio special di potret, cu Nouel su pinturanan 'Enigma van het licht' y 'CubAruba' lo forma parti di e premionan mayor.

E pinturanan aki ta cay bou di su serie cultura Arubano/ Caribeño.

E conocido artista Arubiano tambe a wordo pidi pa DNKL pa actua como embahador pa nan fundacion.

Actualmente e artista, especialista den pinta potret (www.gustavenouel.com), ta preparando cursonan nobo pa

por ofrece na Aruba, na talen-tonan interesa.

Tin contacto cu Cas di Cultura, Universidad di Aruba y Biblioteca Nacional pa por realisa esaki y otro actividadnan artistico na november 2013. □

